

**Rosmah Mansor Hadir Persidangan Wanita Antarabangsa, Paris 4,5 Jun
Bernama
Mei 31, 2014**

KUALA LUMPUR, 31 Mei (Bernama) -- Isteri Perdana Menteri Datin Seri Rosmah Mansor akan menghadiri Persidangan Wanita Antarabangsa 2014 bertema 'Women: Redesigning Economies, Societies' di Paris, Perancis pada 4 dan 5 Jun ini.

Menurut satu kenyataan Pejabat Perdana Menteri, Rosmah akan berucap pada majlis perasmian persidangan itu di hadapan 1,000 peserta terdiri daripada pemimpin, usahawan dan wanita korporat seluruh dunia.

Turut sama ialah Menteri Pembangunan Wanita, Keluarga dan Masyarakat Datuk Rohani Abdul Karim, isteri Menteri Perdagangan Antarabangsa dan Industri Datin Seri Khamarzan Ahmed Meah, pegawai kanan dari agensi berkaitan dan 60 usahawan daripada pelbagai sektor korporat.

Bersempena kehadiran Rosmah ke Paris itu, beliau akan menjadi hos pertunjukan fesyen yang memperkenalkan batik, songket dan tenunan tempatan di Le Pre Catalan, Lenote.

"Pertunjukan fesyen bertemakan 'Eleganza' akan mempamerkan hasil karya lima pereka tersohor negara dan akan dihadiri oleh 300 jemputan yang terdiri daripada mereka yang berpengaruh dalam industri fesyen di Paris termasuk para pereka, ejen pembeli, komuniti bisnes dan media antarabangsa," kata kenyataan itu.

Pertunjukan anjuran bersama MATRADE, Tourism Malaysia dan Perbadanan Kraftangan itu merupakan platform yang baik untuk mempromosi keunikan dan kepelbagaian tekstil tempatan yang berkualiti tinggi.

Selain itu, Rosmah akan merasmikan Sesi Jaringan Perniagaan anjuran bersama MATRADE dan SME Corporation yang bertujuan memperluas rangkaian perniagaan antara usahawan wanita Malaysia dengan Perancis.

Program itu akan dihadiri usahawan terkemuka Malaysia yang menceburi perniagaan dalam pelbagai sektor dan juga usahawan Perancis.

Sementara itu, Rosmah yang juga Penaung Larian Terusan Sutera Marco Polo, akan menyambut ketibaan pelari wanita negara Suwaibah Muhammad Nasir di Venice, Itali pada 3 Jun.

Kehadiran beliau ke larian penamat itu bagi membuktikan sokongan terhadap misi kemanusiaan Suwaibah dan mengiktiraf keazaman serta kegigihan wanita dalam menempuhi cabaran untuk mencapai kejayaan.

Larian bertema 'One World, One Hope' itu, yang bermula di Beijing pada Mac lepas, merentasi 12 negara meliputi China, Kyrgyztan, Kazakhstan, Uzbekistan, Turkmenistan, Iran, Turki, Bulgaria, Serbia, Croatia, Slovenia dan Itali.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1042926>